

四庫全書

史部

欽定四庫全書

平定準噶爾方略正編卷九

乾隆二十年春三月庚寅

命叅贊大臣達爾黨阿會同定邊左副將軍阿睦爾
撤納進兵

上諭軍機大臣曰達爾黨阿奏帶領索倫兵三百名
於三月初三日至軍營初六日起程繼大兵前進
達爾黨阿所領係索倫勁卒又經伊自行揀選者

著傳諭班第侯達爾黨阿兵到時急速前進務同
阿睦爾撒納前隊哨探兵一併進發

諭定北將軍班第辦理烏梁海宰桑都塔齊事宜

上諭軍機大臣曰班第奏烏梁海宰桑都塔齊已送
至烏里雅蘇台軍營若復令其前至卡倫路遠恐
有疎虞現在移咨駐劄烏里雅蘇台大臣哈達哈
等即行正法等語從前因青滾雜卜之言令將都
塔齊拏至卡倫正法似都塔齊所住離卡倫甚近

今據班第此奏則都塔齊送至烏里雅蘇台始赴
卡倫似此輾轉迂迴前奏何以並不聲明著班第
查明遇便覆奏再都塔齊如已到烏里雅蘇台正
法即可無庸置議倘尚在未到或伊推托不即前
來即遵朕前降諭旨俟大功告成後再為辦理此
時且勿令其驚懼並傳諭班第及哈達哈等知之
定北將軍班第密奏定邊左副將軍阿睦爾撒
納沿途情形

班第奏言昨歲阿睦爾撒納在熱河時奉

旨將貝勒扎木叅派往屯田阿睦爾撒納自到軍營
從未言及近又奉

旨令齊木庫爾更換扎木叅前往額爾齊斯地方屯
田臣隨行知阿睦爾撒納並令其派定兵丁前
往屯田往返再三總未商定近始據覆遵

旨留齊木庫爾於屯田地方駐劄並派輝特和碩特
兵一百名都爾伯特兵一百名並喀爾喀兵三

百名一同前往以資守望仍俟伊領兵到彼酌量情形指示駐劄屯種事宜再查新來投誠之沙畢納爾得木齊錫喇哈什哈等詢係班禪之沙畢納爾並未稱係拉藏汗之屬人而阿睦爾撒納奏稿內指為拉藏汗之屬人班珠爾又向伊等言我祖原係爾青海之汗爾等或即係我和碩特部落之語其中明有希圖僥倖之意臣近經過包沁游牧地方詢知阿睦爾撒納等經

過時將伊屬下人認出帶往外又多帶男女十
五口並未報明臣現在行文咨查並密行寄信
額駙色布騰巴爾珠爾留心詳察毋許伊等妄
生僥倖奏入得

旨此尚係小事如約束太過或轉阻伊等奮往之心
若遇重大事務自不得令伊等專擅也

辛卯

命副都統多爾濟運解阿睦爾撒納等俸餉於張家

口

上諭軍機大臣曰納穆扎爾奏支領阿睦爾撒納等俸餉之厄魯特人等現派領催敦珠克帶領於三月初九日自塔米爾起程來京厄魯特人等到京時已值夏令天氣漸熱恐其不耐炎暑或致患病宜加體恤著派副都統多爾濟將阿睦爾撒納等應支俸餉緞匹等項運往張家口俟厄魯特人等到時一一照數給與仍將朕體恤伊等不令入京

之旨明白曉諭令其歸至游牧時轉傳與該扎薩克宰桑等知悉並傳諭納穆扎爾知之

壬辰

定北將軍班第疏奏領兵起程日期

班第奏言臣帶領察哈爾官兵於三月初六日至齊齊克淖爾地方放給馬匹駝隻查明隊哨探兵揀選馬匹之外現有馬四千餘匹其中有臃瘦不堪乘騎者又各處尚有未到馬匹今前

隊兵出卡倫已行三日若俟馬匹全到臣始出
卡倫恐相離稍遠難以策應是以即將現在所
有馬駝先支給一千五百名官兵乘騎之用臣
於初八日即帶領起程出巴顏珠爾克卡倫前
往其餘兵五百名俟馬匹一到即以次接續前
進亦不致中途遲滯奏入報

聞

定北將軍班第疏奏編設補放包沁人等佐領

事宜

班第奏言臣查包沁之七得秦所有人丁多寡不等應照扎哈沁之例每得秦編一佐領共編七佐領已交與員外郎納蘇圖編定今臣於三月初三日駐劄庫卜克爾地方據包沁總管阿克珠勒翼領台拉克父子帶領擬放佐領得木齊人等驗看伊等皆係阿克珠勒保送且人俱去得臣即照其所擬宣示

諭旨令其各勤職業約束屬人共遵法紀其阿克珠
勒所請總理七佐領事務之阿勒巴齊顏達什
可否照扎哈沁阿勒巴齊唐古忒之例給與叅
將職銜出自

天恩奏入

上從之

癸巳

命定西將軍永常仍回肅州不必迅速前進

上諭軍機大臣曰據永常奏自肅州前至巴里坤即帶現在兵丁進發并咨後隊帶兵大臣等兵足一千亦即迅速前進永常之意特欲急進邀功不知伊係將軍一切事務俱應承辦劉統勲不過協同辦理乃永常諸事俱委之劉統勲伊之專責似止在帶兵一進餘皆無涉者殊屬謬誤著傳諭永常即遵前旨仍回肅州辦理一應事務果能妥協即未帶兵前進朕亦必將伊議叙今彼處口糧既少

何必又帶此無用綠旗兵汲汲先進耶至移咨索
倫兵但足一千即行前往此特為伊子額爾登額
耳其於事理當否亦曾悉心籌及乎永常務令各
隊兵丁仍遵前旨量足二千帶領前進不得故違
取戾

甲午

協辦陝甘總督劉統勲疏奏各處官兵全過蘭
州情形

劉統勲奏言臣於三月初三日自肅州起程彼時索倫第一起兵已經出口二起甫到肅州近據肅州道閻介年等文稱索倫第三起兵於初七日亦經出口臣途次遇見西安滿洲兵及索倫健銳營哲里木各處官兵俱按起行走整齊安靜各臺車馬均能供應遄行及臣到蘭州各處官兵已經全過其臺站所僱民間車馬據布政使史奕昂文稱河東各站已盡歸農河西各

站亦於兵過後陸續遣散當此春深雨足及時
力作於農事亦甚有益奏入報

聞

乙未

定邊右副將軍薩喇爾等疏奏扎哈沁宰桑敦
多克等率衆來降

薩喇爾等奏言臣等領兵於三月初七日至扎
哈沁游牧地方扎哈沁得木齊巴哈曼集前來

投誠臣等恭奉

聖主撫卹歸附人等

恩旨明白宣示巴哈曼集奏稱我等仰賴

大皇帝天恩得以安生我屬下人三百餘戶俱情願

歸附再宰桑敦多克所居游牧尚遠我遣人送

信敦多克伊亦自必投誠至初九日早宰桑敦

多克歸附前來告稱我等入衆一千二百餘戶

俱情願歸附臣等竊思扎哈沁係準噶爾邊界

之人若甫經歸順卽查開戶口數目伊等未免
驚疑是以臣等安慰衆心謹將

勅書給宰桑敦多克得木齊巴哈曼集各一道並諭
以後隊大兵經過爾地於爾等並無滋擾將此
遍諭爾衆仍各照常安居並繕寫檄諭給與伏
念大兵前進之信準噶爾人衆必有見聞若不
將

聖主恩旨豫先傳布曉示準噶爾人衆易致驚惶逃

竄是以臣等將頒發噶爾藏多爾濟之

勅書即遣三等侍衛瑚集圖等帶領扎哈沁之巴巴
及在噶爾藏多爾濟處之薩喇爾屬下塞貝齊
送前往並將頒發布魯古特等衆之

勅書亦交瑚集圖等齎去令由噶爾藏多爾濟處轉
交其頒發吐魯番回民之

旨交公額敏和卓派愛特瑪特等三人齎去由此前
進如有歸附之人俱遵

勅旨曉諭務令各居本地游牧不致少有驚懼奏入
上諭軍機大臣曰薩喇爾等奏稱扎哈沁得木齊巴
哈曼集帶領三百餘戶來降扎哈沁宰桑敦多克
帶領一千餘戶來降如即細查伊等戶口恐反生
疑惑隨將勅書給敦多克巴哈曼集各一道曉諭
伊等使無驚懼仍令照舊安居薩喇爾辦理甚妥
著傳諭班第阿睦爾撒納等料阿睦爾撒納前進
似此投誠者必多俱可照此辦理又

諭曰額林沁多爾濟同永常帶兵前進朕已降旨令永常回肅額林沁多爾濟可俟濟福到後即同彼曉諭敦多克等言爾等聞大兵一到即便輸誠已據將軍奏聞大皇帝極為獎賞特授敦多克為散秩大臣賞給孔雀翎巴哈曼集為三等侍衛並各賞給衣服敦多克所屬或有應行鼓勵之人另交孔雀翎五枝令敦多克酌量賞給俟功成後仍當加以重恩務須明白曉諭令其深知朕意至彼處

如必需兵彈壓額林沁多爾濟即帶兵居住倘毋庸留兵仍遵前旨帶兵前進

丙申

密諭定北將軍班第

上諭軍機大臣曰班第奏稱據阿睦爾撒納等咨請將綏綢喇嘛併沙畢納爾數人移至伊等現住之扎卜堪游牧居住懇降旨將此等喇嘛暫時另行安置俟事定後遷至青海仍歸班禪額爾德尼屬

下則一切爭競之端可杜班第所見雖是但將伊等遷至青海既多煩擾亦恐阿睦爾撒納生疑頃阿睦爾撒納將伊等投誠之處具奏朕令於伊犁地方設立一庫倫由京師遣胡土克圖喇嘛前往教經班第可照此辦理俟功成時入於應辦事宜內議奏此時且勿令阿睦爾撒納聞知恐其別生他意也再前班第奏稱阿睦爾撒納等過扎哈沁時私將人口帶往朕以非大事不必過於約束今

觀此情形其心跡已露若俱置之不問恐其益生
妄想班第可密加節制但勿洩漏為要又前令班
第進兵與阿睦爾撒納相隔十日前往今既欲從
中節制則須急行一兩日以相離七八日為妥然
亦不必太急納噶查情願移至青海之語如係實
心尚屬可憫俟將來令其遷往亦可此時尚可毋
庸曉諭倘伊復行詢問惟以此非必不可行之事
將來斷無不准答之可耳將此密諭班第知之

諭叅贊大臣哈達哈傳

諭齊默特多爾濟進兵事宜

上諭軍機大臣曰朕昨命齊默特多爾濟所帶之兵
即行撤回特因其辦理不善故耳今齊默特多爾
濟既自知其非揀選精兵三百名前進務於三月
二十四五日前赴軍營尚屬可恕著傳諭哈達哈
如齊默特多爾濟果於限內能到即不必令回游
牧准其前往効力若在遲悞即將此旨宣示令其

撤回倘哈達哈已經起程即著莫爾渾遵旨辦理
命喀喇沁公瑚圖靈阿馳驛來京

上諭軍機大臣曰現在準噶爾部落降人絡繹有應
接應來人及齎物賞賚之事須用大員前往著傳
諭瑚圖靈阿馳驛來京候朕遣用

己亥

密諭定邊右副將軍薩喇爾等

班第奏言據副將軍阿睦爾撒納等稱扎哈沁

內有輝特人五十餘戶并在包沁之都爾伯特
及葉克明安等人請即速行給發臣即覆稱去
年收服扎哈沁時爾等所收人口俱經查明帶
往其包沁地方原住之輝特兵丁係從各鄂拓
克攢集並非臨陣所獲未便聽其帶往且業已
奉

旨編設佐領至葉克明安四十餘戶暫時另行安置
俟伊等台吉到日公同辦理其包沁內所有都

爾伯特人等現在包沁居住亦經奏明未便擅自給與奏入

上諭軍機大臣曰班第奏稱阿睦爾撒納訥默庫請將扎哈沁包沁內所有輝特都爾伯特及葉克明安人等俱即給發伊等管轄班第不准所請辦理甚屬妥協著將原摺抄寄薩喇爾扎拉豐阿鄂容安知悉看來策凌策凌烏巴什人雖樸實然不能保其無此等僥倖之心倘有似此情事薩喇爾等

即照此辦理但須密加防範勿稍宣露再北路哨探兵奏摺內將班珠爾訥默庫之名一併開列甚是西路至博羅塔拉後遇有奏摺亦將策凌策凌烏巴什策凌孟克塞卜騰之名列於鄂容安之後一併傳諭薩喇爾等知之

壬寅

定邊右副將軍薩喇爾等疏奏噶爾藏多爾濟等率衆來降

薩喇爾等奏言臣等派侍衛瑚集團等齎

勅書前往傳諭噶爾藏多爾濟等今於三月初十日

據阿巴噶斯舊宰桑德濟特之弟普爾普德濟

特之子袞布投誠前來告稱我等宰桑德濟特

並無過犯為達瓦齊殺害深為憤恨今聞

大皇帝天兵將到情願率領我屬六十六戶人丁隨

營効力十三日據布魯古特之得木齊巴拉等

三人前來告稱我等因達瓦齊暴虐困苦不堪

日望

大皇帝天兵速至今遇將軍大人等宣諭

大皇帝恩旨現今布魯古特台吉諾海奇齊等三十餘台吉並我等屬下共五百餘戶情願投誠受

大皇帝恩典又據葉克明安輝特台吉托博勒登族弟巴朗前來迎接告稱我兄台吉托博勒登因臂折不能騎馬遣我率領屬下三十餘戶投誠又同巴朗前來之噶勒雜特得木齊博勒坤策

凌們綽克率領屬下一百戶來降臣等傳宣

皇上恩旨曉諭台吉巴朗等仍令在各本處居住賞
給茶葉慰諭安插至十四日據巴爾瑪部落得
木齊伯克勒特收楞額庫魯克等前來告稱我
等原係巴爾瑪部落之人已來扎哈沁地方居
住十餘年今聞大兵將到我等率領舊宰桑噶
齊拜之子圖爾塔默特六十戶同來投誠本日
復據侍衛瑚集圖等帶領噶爾藏多爾濟所遣

迎接之宰桑扎爾布多爾濟前來告稱我等恭
捧

勅書於三月十二日到噶爾藏多爾濟所居額林哈
畢爾噶之羅克倫地方頒發

勅書噶爾藏多爾濟敬謹跪聽奏稱

大皇帝洞鑒我處情形實為

聖明達瓦齊殘虐所屬人衆無不離心解體達瓦齊
與我勢力相等彼此不相侵犯數年以來我準

噶爾互相殘殺達瓦齊自篡奪台吉以來我屢
行勸阻不從是以數年中並不通信去歲向我
調兵我亦不發今年移書令我在額林哈畢爾
噶備兵一萬我並不豫備大兵過時我屬下人
等俱令照常耕種並不逃避今

大皇帝撫恤準噶爾人衆

恩旨下頒我情願率領所屬投誠仰承

恩典伏思噶爾藏多爾濟乃準噶爾大台吉人亦曉

事間大兵前進飭屬照常耕種殊為誠心向化
觀此則軍行所過自必踴躍歸誠勢如破竹可
以豫定奏入

上諭軍機大臣曰據薩喇爾等奏噶爾藏多爾濟率
衆投誠看來大功告成在指顧間不勝欣慰薩拉
爾遵朕訓示動合機宜實屬可嘉俟功成後加恩
優叙先將朕所佩荷包賜予並賞給雙眼翎以示
優獎噶爾藏多爾濟乃準噶爾大台吉所屬之人

甚衆著薩喇爾即同扎拉豐阿鄂容安策凌策凌
烏巴什策凌孟克降旨曉諭朕聞伊來降甚為喜
悅特遣侍郎玉保前往降旨獎諭因道遠不能多
賚什物先將朕御用數珠荷包等賜予侯大功告
成後更加殊恩寵錫天朝此次用兵實因準噶爾
地方互相殘殺民不聊生是以特命六師前來拯
救俟平定準噶爾後令四衛喇特人等照舊安居
並封王爵共享昇平噶爾藏多爾濟既為準噶爾

大白吉即封為綽羅斯汗其阿睦爾撒納應封輝
特汗策凌應封都爾伯特汗班珠爾應封和碩特
汗同至熱河朝覲大加宴賞故先為宣示彼汝知
之再於投降各台吉等亦降旨宣諭汝等傾誠向
化皇上俱深為優獎因汝等戶口多寡差等尚未
周知是以未頒賞賚什物一俟玉保查奏即行賞
給策凌等帶至熱河入覲應賞給爵秩者亦即給
予可一一曉諭俾伊等踴躍歡欣佇荷朕恩又

諭曰噶爾藏多爾濟乃準噶爾大台吉今率所屬來降平定準噶爾大功告成必速此實

上天眷佑大兵所到不煩一矢皆已稽首歸誠著將薩刺爾原奏抄寄班第阿睦爾撒納閱看料沙克都爾曼濟此時亦當由北路來降果爾阿睦爾撒納可即宣諭汝係大台吉大皇帝必封以王爵且我等俱叨受天恩汝復更何疑慮仍將何時投誠之處速即奏聞至沙克都爾曼濟等來降後亦即應

令伊等入覲西路著派扎拉豐阿北路著派阿蘭
泰同策凌等帶領伊等由阿爾台前至熱河瞻仰
朕躬以地處口外甚為涼爽於蒙古人頗相宜也
再應入覲之人倘為數無多即俱令前來如因人
衆乘傳稍難即令大台吉數人先來餘人另為一
班俟明年入覲亦可仍將現在前來人數及何日
起程之處奏聞其應封爵秩之人亦應查辦且查
封時即可灼知其戶口多寡之數阿睦爾撒納等

並應將從前先至熱河如何深受朕恩之處詳悉
曉諭俾伊等共知慶忭也又

諭曰莫爾渾等不知現在軍行情形未免妄生疑慮
著將薩喇爾奏噶爾藏多爾濟投降一摺即行抄
寄令傳諭衆喀爾喀等共知成功迅速所有應來
入覲之人已另諭兩路將軍等辦理但伊等前來
騎馱牲口及所食口糧羊隻若照去年令喀爾喀
等豫備未免拮据此時豫備各隊官兵牲口羊隻

甚多如前隊一至伊犁成功則後隊之兵毋庸更
進即可將所餘牲口羊隻安設臺站供給新降人
等著派兆惠專管務即妥協辦理無致貽悞并將
不令喀爾喀等豫備之處明白曉諭俾知朕體恤
遠人至意

癸卯

命侍郎何國宗測量西陲度數

上諭大學士曰西師報捷噶爾藏多爾濟抒誠內附

西陲諸部相率來歸願入版圖其日出入晝夜節
氣時刻宜載入時憲書頒賜正朔以昭遠裔向化
之盛侍郎何國宗素諳測量著加尚書銜帶同五
官正明安圖司務那海前往各該處測其北極高
度東西偏度繪圖呈覽所有坤輿全圖及應需儀
器著何國宗酌量帶往

夏四月甲辰朔

命西北兩路將軍等撫定準噶爾後即遣投誠人等

入

觀

上諭軍機大臣曰班第奏擒獲厄魯特六人詢知巴朗與烏梁海同在訥齊庫地方都噶爾在那木地方現在遣兵往擒西路並遣人前來通信班第等亦將四月望前後可至博羅塔拉之信通知西路兩路聲息交通噶爾藏多爾濟等人衆俱各前來投誠以此觀之仰荷

上天默佑膚功必能迅奏前已降旨兩路將軍令將派出應來入覲人衆交扎拉豐阿阿蘭泰策凌等帶領由阿爾台前赴熱河著再傳諭兩路將軍伊等兵抵伊犁將撫定準噶爾全部事宜部署略定即將應行入覲者派出前來如於八月初間即到值朕駐蹕熱河時賜宴賞賚仍可令伊等扈從木蘭行圍倘時日不及則竟候朕木蘭回鑾於十月初間至熱河陛見亦可班第等即遵旨酌量定奪一

面辦理一面奏聞其安設臺站事務已降旨令兆惠承辦即轉飭兆惠豫為妥協辦理

叅贊大臣哈達哈疏奏官兵起程日期

哈達哈奏言臣遵奉

諭旨於莫爾渾到烏里雅蘇台後臣即領兵繼班第前進今於三月二十一起程惟酌量馬匹力量追赴將軍班第陸續前進再喀爾喀王額林沁已領兵四百名於本月二十日前後可抵軍

營其右衛歸化城之兵亦漸次可到臣已飭烏里雅蘇台辦事大臣將馬駝口糧等項豫備妥協俟各兵到日即酌給催令起程奏入報

聞

丙午

定邊左副將軍阿睦爾撒納等疏報擒獲逃人們都

阿睦爾撒納等奏言三月十五日郡王班珠爾

等將與巴朗同逃之們都擒獲詢據們都供從
前巴朗原同我在阿里克台地方居住繼又移
向布哈和洛我從阿里克台即與彼離散不知
巴朗仍在布哈和洛與否自布哈和洛至額爾
齊斯約五六日趲行可到又供聞噶勒雜特之
都噶爾攜達什敦多卜妻子與哈薩克錫喇同
向額林哈畢爾噶去伊屬下有一得泰之人尚
在奇蘭地方居住臣等查們都所供雖不足信

但布哈和洛地方係臣等進兵便道而奇蘭地方又與額爾齊斯相近當即派貝子策卜登等酌帶侍衛台吉領兵三百名速赴布哈和洛地方務將巴朗擒獲如巴朗又向別處潛逃納林布魯爾居住之烏梁海宰桑博博與臣阿睦爾撒納交好令策卜登等即揀選烏梁海數人潛往博博處告知令其差人擒拏巴朗又派副都統職銜達什敦多卜等往奇蘭地方令將噶勒

雜特之宰桑都噶爾留下一得泰之人收服臣
與郡王班珠爾貝子德濟特仍帶兵前進奏入
報

聞

定邊左副將軍阿睦爾撒納等疏報額林哈畢
爾噶宰桑阿巴噶斯烏勒木濟哈丹等來降
阿睦爾撒納等奏言三月十五日有額林哈畢
爾噶之宰桑阿巴噶斯烏勒木濟哈丹等三人

帶領三十人迎接大兵投誠前來詢知阿巴噶
斯哈丹係兄弟二人屬下戶口共二千六百有
餘烏勒木濟屬下戶口共一千三百有餘伊等
投誠先來至所屬現住額林哈畢爾噶地方臣
等加意撫慰並恭宣

諭旨令其不必遷移仍在原住地方游牧阿巴噶斯
等告稱我等雖皆願居原處但不敢妄自求請
今蒙

大皇帝早已洞照實不勝歡忭惟求速遣一人送信
游牧處令聚集兵丁保守以備不虞隨派得木
齊錫喇卜會同哈丹前赴額林哈畢爾噶地方
將

聖主撫卹準噶爾全部之

旨明白曉諭收服人衆其阿巴噶斯烏勒木濟二人
臣等現在帶往軍前効力仍於阿巴噶斯烏勒
木濟屬下兩鄂拓克三千餘戶內酌量揀選一

二千兵帶來効力果能奮勉另行察核具奏又
詢知去年十月內巴特瑪車凌額林沁阿布賚
帶領厄魯特哈薩克兵一萬有餘將博羅塔拉
等處所有游牧人衆盡行搶掠阿布賚於閏勒
奇嶺東將擄掠人帶回巴特瑪車凌額林沁帶
兵四千餘直入伊犁將居住伊犁河北達瓦齊
之厄魯特回子盡行擄掠達瓦齊與巴特瑪車
凌相拒月餘巴特瑪車凌力不能繼始行脫回

現在或云在古爾班色爾克或云在庫克薩勒
或云在哈喇巴噶紛紛不一究未知現在何處
至問其由噶勒雜特游牧處至伊犁尚有游牧
人等與否據阿巴噶斯等告稱齋爾地方尚有
集賽鄂拓克四五百人係宰桑齊巴克額伯濟
二人統領居住尚可得四五千兵其噶爾藏多
爾濟屬下現有二千餘戶前經達瓦齊調取伊
等並未前往觀此必無敢抗拒軍行之意但哈

薩克錫刺巴雅爾今既遷往伊等或從中挑搆
生釁亦未可定臣等伏思集賽人衆既在齊爾
居住自應乘機進兵於現在帶來六千兵內揀
選三千臣阿睦爾撒納等帶往先至察罕呼濟
爾地方展放卡倫以資守望俟有實信然後遣
人齎奉

勅諭招撫伊等如投誠前來即行收服否則當以兵
威擒勦奏入

上諭軍機大臣曰據阿睦爾撒納奏額林哈畢爾噶之宰桑阿巴噶斯等迎接我兵投誠前來阿睦爾撒納即曉諭撫慰遣人收服伊等屬下人衆又將我兵分路前進阿睦爾撒納親身帶領先往集賽鄂拓克處收服人衆辦理頗中機宜阿巴噶斯烏勒木濟哈丹俱係準噶爾舊日大宰桑之子孫今既誠心歸順朕深為眷念著加恩將伊三人俱授為散秩大臣先賞給孔雀翎俟另遣御前侍衛齎

衣帽等物前往頒賜即將此旨先行曉諭伊等知之再觀阿巴噶斯之詞尚未悉噶爾藏多爾濟業已投誠今西路已遣人往收噶爾藏多爾濟將此一併曉諭阿巴噶斯等知之又

諭曰投誠之額林哈畢爾噶宰桑阿巴噶斯等俱係達瓦齊之宰桑應遵朕從前所降諭旨另為一支與瑪木特等一體辦理不得令他人管轄著班第留意俟事定之時另行查辦嗣後陸續前來投誠

人內有似此等者俱照此辦理著即密諭班第知之

丁未

定北將軍班第疏奏中途領兵減裝進發情形
班第奏言三月十九日至郭勒阿里克台地方
據副將軍阿睦爾撒納文稱將新經投誠宰桑
阿巴噶斯烏勒木濟奏明帶往進至阿爾齊斯
查明伊蘇圖銓格圖烏拉克圖等地方俱可屯

田現留貝勒齊木庫爾等候護軍統領塔爾瑪
善到時一同指示耕種再現在奏明前赴察罕
吐濟爾地方所有後隊續進大兵亦迅速前行
方為有益臣即行催塔爾瑪善等速行前往會
同辦理屯田事宜臣將現有察哈爾兵一千五
百名內揀選馬力壯健者六百名臣與喀爾喀
王宰桑多爾濟貝子三都爾扎卜公策登薩木
丕勒等星夜減裝緊隨副將軍等進發其餘兵

丁飭令副都統柏起統領繼至奏入報

聞

駐劄烏里雅蘇台大臣莫爾渾等奏報和碩齊郡王林沁等領兵起程日期

莫爾渾等奏言巴林親王品級叅贊大臣和碩齊郡王林沁帶領昭烏達兵二千名於正月三十日至喀爾喀游牧察罕布哈地方復選兵四百名與教漢郡王喇什喇卜坦帶領先行於三

月二十一日抵烏里雅蘇台二十二三兩日支給馬駝口糧等項於二十四日即起程前進又二十三日王阿咱拉貝勒彭蘇克帶兵八百名前來亦將馬駝口糧辦給於二十五日起程前進奏入報

聞

戊申

命西北兩路將軍等酌議準噶爾投誠賜爵人員世

襲事宜

上諭軍機大臣曰自大兵前進準噶爾部落人衆各帶領鄂拓克陸續前來投誠者甚多朕視其所轄人數酌量加恩有授為散秩大臣及副都統總管者第思準噶爾舊例凡管鄂拓克之宰桑俱世襲罔替是以朕授瑪木特為散秩大臣即令其管轄扎哈沁人衆今陸續投誠之人尚多宜將世襲之例明晰曉諭則現在投誠人衆既益戴朕恩而相

繼歸降者亦倍加感悅於事甚有裨益將此傳諭
班第阿睦爾撒納薩喇爾等通行曉諭知之至如
何酌定世襲及給與勅諭之處俟伊犁底定後即
入於應議事宜內議奏

平定準噶爾方略正編卷九

欽定四庫全書

平定準噶爾方略正編卷十

乾隆二十年夏四月庚戌

諭定邊右副將軍薩喇爾

上諭軍機大臣曰據薩喇爾等奏帶領噶爾藏多爾濟投誠人等前進又羈留達瓦齊之來使帶往進發辦理悉中機宜朕深為嘉悅佇望捷音閱伊奏內有噶爾藏多爾濟人尚明白但心跡叵測之語

朕思噶爾藏多爾濟雖不可深信現在既已投誠
又帶兵一同前進量亦無意外之虞若防範太過
恐伊知覺反生貳心惟有示以大度默化其疑懼
之意而已至朕以哈薩克錫喇稍有疑竇者蓋彼
係北路之人如欲投誠何不即由北路前來反避
走西路其跡似有可疑然既經投誠一同帶兵前
進則疑竇亦自可釋且伊等人衆即有一二略涉
可疑之人今達瓦齊已不克抵敵而我繼至之兵

又接踵前進朕固知其無能為也著將此傳諭薩喇爾等并將伊等前後奏摺錄寄班第等俾北路之兵亦急速進發尤為得力再朕前曾降旨俟俘獲達瓦齊時即行解送來京不可因已據伊犁稍容留頓著再傳諭兩路將軍或達瓦齊被擒或伊束手歸誠俱遵朕前旨辦理

命賞投誠台吉巴雅爾等衣帽有差

上諭軍機大臣曰薩喇爾奏稱領兵至額林哈畢爾

噶地方彼處投誠台吉宰桑等陸續前來出自誠
悃應加恩賞賚第道里迢遙賞賜什物不便多齎
著派侍衛端濟布前往賞給已雅爾扎那噶爾布
元狐帽各一頂馬褂各一件數珠各一盤台吉達
瓦伯克莽噶里克貂皮帽各一頂數珠各一盤宰
桑哈薩克錫喇著授為散秩大臣賞給孔雀翎並
皮帽一頂帶領薩喇爾戶口前來之巴本亦著賞
給孔雀翎其餘帶領所屬百戶以上之台吉頭目

共七起賞給皮帽各一頂大荷包各一對薩喇爾
先將此曉諭伊等俾知朕恩俟大功告成再沛殊
恩其帶領所屬來降百戶以下者亦著薩喇爾分
晰記明俟伊犁底定後奏聞另行賞齎

諭定北將軍班第等安插逃人已顏思克人等事宜
上諭軍機大臣曰據班第奏同巴朗潛逃之台吉巴
顏思克并伊屬人四戶俱行俘獲擬令徒步解送
京師又請將察達克屬下烏梁海得木齊哈爾敦

所屬兩戶暫交塔爾瑪善安插照管俟伊犁底定
後仍遣往察達克居住巴顏恩克被巴朗逼勒同
行尚非有意逃竄且前此又有欲脫出來投之語
巴顏恩克無庸解送京師著將伊屬下人一併交
舒明俾同策凌等游牧安插巴顏恩克在途屢被
擄掠今又徒步行走艱窘之狀殊堪憫惻著班第
即飭駐劄烏里雅蘇台大臣酌量賞給口糧以示
體卹哈爾敦既係察達克屬下得木齊不必交塔

爾瑪善安插即遣往察達克等現在游牧地方令其聚處至巴顏恩克告稱巴朗已向北逃往布哈和洛地方孟克特穆爾及都噶爾一同逃往額林哈畢爾噶地方巴朗已遣察達克往拿自必被擒其孟克特穆爾即著傳諭薩喇爾速行遣兵俘獲押解來京

諭定西將軍永常進兵事宜

上諭軍機大臣曰朕前降旨令永常等將帶領前往

之兵交額林沁多爾濟統領永常即回肅州辦理
各處續到兵丁起程事宜俟完竣後再行帶兵進
發今薩喇爾等奏稱已行知永常帶兵隨後繼進
著傳諭永常伊若接薩喇爾咨文業經前進自無
庸中止倘先接奉令伊回肅之旨現在馳赴肅州
則不必復帶兵進發仍遵照前旨辦理俟各處兵
丁起程後再為後殿前往仍轉飭額林沁多爾濟督
兵繼進以為聲援

命免治努三烏爾登罪仍留軍營効力

上諭軍機大臣曰據班第等審詢努三烏爾登擬以應斬監候努三烏爾登收服扎哈沁後並不往拿已朗實係貽誤軍機罪不可逭但念伊二人去歲收服烏梁海扎哈沁時亦曾隨同効力著加恩免其治罪仍留軍營以閒散効力贖罪努三烏爾登俱係滿洲世僕乃在軍營逡巡畏葸此次不即正法俾全首領皆朕格外之恩其由軍營查出馬匹

什物及伊二人所有家產俱著入官

壬子

定邊右副將軍薩喇爾疏奏都爾伯特扎薩克

台吉巴爾等投降戶口數目

薩喇爾等奏言臣等領兵前進自三月十六日

至二十三日聞

皇上恩旨陸續投誠者甚衆今將都爾伯特扎薩克
台吉巴爾等各處戶口查明數目共七千四百

七十三戶奏入報

聞

癸丑

定西將軍永常疏奏續領兵丁進發情形

永常奏言臣於三月初九日領兵自己里坤起程至十八日在阿克塔斯地方接副將軍薩喇爾等咨現帶兵向烏魯木齊進發可即速領兵前來接應臣即併站星馳今已抵察罕烏蘇距

薩喇爾等所駐羅克倫地方約四百里奏入報
聞

定北將軍班第疏奏噶勒雜特根敦等率衆來
降

班第奏言臣等前遣副都統銜達什敦多卜等
前往漢達蓋圖地方收服噶勒雜特人等達什
敦多卜到彼宣示

恩旨剴切曉諭其十家長根敦集衆跪稱我等去年

為大兵所擒復蒙釋放感激

皇上傾心歸順是以都噶爾遷向額林哈畢爾噶時
我等七十一戶仍在此居住今大兵前來理應
多派兵丁跟隨効力但馬匹疲瘦情願派出十
人隨營効力臣等慰諭根敦令仍在原處居住
將所屬人衆善為約束遣回游牧其派出進兵
十人因詞意誠懇現即一同帶往奏入報

聞

甲寅

諭定北將軍班第等分隊進兵事宜

上諭軍機大臣曰班第奏稱帶兵前往額爾齊斯之西喇托輝地方已與阿睦爾撒納前隊會合等語大兵進剿自宜略分先後經朕屢降諭旨令班第計阿睦爾撒納行程約離數日相繼前進一則阿睦爾撒納係準噶爾人衆知名之人今伊帶哨探兵前行人多認識於收服準夷人衆較易再前隊

既有哨探兵復有將軍隨後帶兵繼進聲勢聯絡
軍威益振如將軍副將軍合併一處則衆人惟知
有將軍不復更知有副將軍轉置阿睦爾撒納於
無用之地不足以展其所長殊於軍行無益前因
永常急遽進兵其意惟恐薩喇爾首先成功伊不
得同邀爵賞朕已降旨訓飭班第若亦存此意即
屬器量狹小豈朕委任之意即使阿睦爾撒納先
抵伊犁克奏膚功朕於班第亦必加恩若先存急

於赴功之意恐反不能承受朕恩矣著傳諭班第
阿睦爾撒納伊二人務須酌量相離數日陸續進
發不得同在一隊行走西路將軍永常薩喇爾等
亦遵朕屢次諭旨前進毋得故違取戾

命西北兩路將軍等籌辦遣回各處兵丁事宜

上諭軍機大臣曰從前派往西路之索論巴爾虎察
哈爾哲里木各處兵丁俱由腹地前往因邊外道
里稍遠春季馬力不足恐未能遠涉現今兩路進

兵成功指日可待各處兵丁奏凱言旋若仍由腹
地行走地方料理頓宿不無繁費且伊等素居邊
外時當夏令炎熱行走亦不相宜著傳諭班第等
俟各處兵丁遣回時俱飭令由邊外行走其派往
西路之各處兵丁亦應由阿爾台一路取道遣回
沿途水草肥美乘便至額爾齊斯收取所種糧石
以資口食於兵丁更為有益若成功甚速後隊兵
丁尚有未過巴里坤者仍令由腹地遣回此雖係

奏凱後辦理之事但臨時請旨未免遲緩著班第
阿睦爾撒納薩喇爾等預為留心斟酌妥辦

乙卯

諭定北將軍永常進兵應援事宜

上諭軍機大臣曰永常奏稱索倫巴爾虎哲里木各
處兵丁俱已至肅州伊接到諭旨即擬回至肅州
及抵巴里坤而各處兵丁俱已就道是以即照薩
喇爾等來咨領兵前赴烏魯木齊駐劄以為聲援

俟索倫巴爾虎兵一到即遣令前往策應其薩喇
爾隊內撤出之寧夏涼州莊浪等處兵丁入於末
隊兵內候哨探兵信息如無需用之處即同綠旗
兵一并撤回永常此次辦理尚合機宜朕前降旨
令永常回至肅州特因永常於任內應辦之事全
無籌畫惟務邀功輕進恐貽笑蒙古人衆耳今接
薩喇爾咨即前赴烏魯木齊以為聲援應將駐劄
兵丁留心約束俟薩喇爾有調取之信再親身帶

兵前往倘因朕此旨仍復冒昧前進或一聞薩喇爾得伊犁之信思欲邀功輕舉妄動則大不可永常係將軍俟薩喇爾底定伊犁身臨其地一同辦理亦體制應爾彼時大局已定將應令駐守之兵即分派駐守應撤回者即飭交領隊大臣等撤回伊酌量帶兵數百名從容前赴伊犁商辦善後事宜庶為允協原不在此時急遽同進始足表其奮往之忱也永常可即遵旨辦理毋得冒昧取戾至

薩喇爾等將寧夏涼州莊浪等處疲乏兵丁裁汰顯係帶隊行走之大臣侍衛等不能善為約束著永常查明據實叅奏如稍有徇隱亦難逃朕洞鑒定邊右副將軍薩喇爾疏奏呼爾瑞台吉納木奇等率衆來降及領兵前赴博羅塔拉情形

薩喇爾等奏言臣前奏請俟將軍永常到烏魯木齊將臣等所領疲乏兵丁裁撤留駐交伊統領以為聲援添派和托輝特兵並令新降之台

吉宰桑等酌派所部兵丁臣等一併帶領起程
仍飭索倫兵殿後繼進其餘各隊兵俱令徐行
休息馬力以張聲威嗣有呼爾瑞台吉納木奇
等率領所屬一千六百餘戶來降臣等宣揚

恩旨賞給緞匹茶葉並准其派出所部兵三百名隨
營効力餘仍令其在原游牧處居住尋據阿睦
爾撒納咨北路兵業經起程四月中旬可抵博
羅塔拉伏思臣前經密奉

諭旨令西北兩路哨探兵於博羅塔拉會合同進
勦毋令北路先發今若照臣前奏俟永常到時
始帶兵起程必落北路之後臣等一面飛檄永
常令督摧和托輝特及索倫兵作速前進一面
於寧夏涼州莊浪滿洲兵內揀選馬匹膽壯可
至伊犁者派出四百名令和起齊努渾帶領與
臣等一同進發復公同商派新降扎哈沁宰桑
敦多克兵三百名臣薩喇爾屬下得木齊鄂勒

錐巴圖爾巴圖兵四十名台吉噶爾藏多爾濟
兵三百名扎那噶爾布兵六十名噶勒雜特宰
桑哈薩克錫喇兵五十名葉克明安台吉巴雅
爾等兵五十名並新派呼爾瑞台吉納木奇等
兵三百名於三月二十九日一併自羅克倫啟
行計程於四月十五日內可抵博羅塔拉俟到
彼處西北兩路會合後其如何協擒達瓦齊之
處相機辦理奏入

上諭軍機大臣曰薩喇爾奏呼爾瑞台吉納木奇等率所屬一千六百餘戶來降並令新降之台吉宰桑等各派所部兵一同進剿現在起程前赴博羅塔拉會合北路兵直抵伊犁薩喇爾辦理妥協甚合機宜朕心深為嘉予呼爾瑞台吉等聞風納款即思効力行陣宜加恩賞以示懷柔著賞給呼爾瑞台吉納木奇元狐帽馬褂數珠各一件其餘台吉等不知共有幾員今賞物五分每分皮帽一頂

大荷包一對即追付侍郎玉保令其齎往分賜俟
準噶爾平定後尚當優加賞賚薩喇爾等將此旨
明白曉諭俾知感激再台吉噶爾藏多爾濟扎那
噶爾布及呼爾璫之台吉宰桑等俱新來歸附之
人感朕恩遇各抒誠悃派兵隨征亦應嘉獎著加
恩將伊等派出兵丁俱照現今出兵人等之例一
體賞給牲畜口糧仍俟入覲熱河時照伊等應封
爵秩再行加恩賞給嗣後再有投誠人等令薩喇

爾等酌量減派出兵以息伊等馬力其現在出兵之台吉宰桑及兵丁數目俱詳悉登記毋致遺漏再薩喇爾所奏現今始過春令所有陸續投誠人等馬力不足是以未將我兵乘騎馬匹與之更換所辦亦甚得體並傳諭北路將軍班第等照此辦理

協辦陝甘總督劉統勲疏奏牧養駝馬事宜

劉統勲奏言各處官兵先後進發所需馬駝前

經調赴肅州揀選支放現在散給出口各兵及
解送軍營之外尚餘駝三千九百餘隻馬六千
七百七十餘匹俱在肅州牧養已久今屈應行
放厥之時查此項馬駝原自各營撥補是以臣
即分給甘肅安西令於就近標營如意牧養以
備調撥奏入報

聞

丙辰

諭定西將軍永常等辦運接濟大兵口糧事宜

上諭軍機大臣曰劉統勲接到永常接濟大兵口糧之咨將哈密所有駝隻口糧現在辦理接濟從前班第等因接濟北路哨探官兵請將駝馬牛羊等項運往豫備曾傳諭永常一體籌辦並無令其運送口糧之旨永常即咨今劉統勲運送殊屬舛誤現在薩喇爾等領兵已至博羅塔拉地方相隔數千里此時既不能速行運到若俟運到時則已早

抵伊犁大功告成更無庸鯁鯁過慮為此數月口糧計矣且前此進兵時裹帶兩月口糧原不過約略計算人之所食多寡不齊倘有一人而兼數人之食者更當作何辦給殊不思官兵前進沿途打牲及疲乏牲畜俱足以資口糧現在投誠厄魯特等所有牲畜產業雖不宜索取然或暫時取用登記數目將來或換給什物或補給銀兩皆無不可今若因接濟滿洲蒙古兵丁口糧而厄魯特兵丁

亦一概給與則帶領厄魯特兵進勦勢必如綠旗
兵丁所云軍行糧隨之陋習有是理乎永常甚屬
乖繆著即詳悉傳諭如口糧尚未運送即行停止
倘已運過巴里坤即令交與永常於現駐烏魯木
齊地方存貯以備將來需用如尚未過巴里坤即
行撤回仍留給密存貯慎勿運至伊犁並將此傳
諭班第阿睦爾撒納等知之又

諭曰永常以接濟口糧之事咨商薩喇爾據薩喇爾

咨兵丁前抵伊犁及回至巴里坤兩月口糧尚不
敷用永常即由伊所領綠旗兵丁裹帶口糧內借
支十日先行運往並將貝勒玉素富所有兒駝馬
數百匹及從前所買羊一萬五千隻俱行運送接
濟永常如此辦理垂繆已極薩喇爾現在領兵前
進如須接濟口糧自必早為籌畫今伊回文內所
稱前抵伊犁及回至巴里坤兩月口糧尚不敷用
並非現在急須接濟之語而永常一似刻不容緩

即將伊隊內兵丁口糧借支十日急行運往稍有
知識之人斷不出此況朕從前降旨原指牲畜而
言若無牲畜即肉乾亦可運往而永常等亟亟籌
運口糧殊不可解此次所運十日口糧不准入正
項開銷著永常自行賠補

協辦陝甘總督劉統勲疏奏撥給駝馬安設臺
站事宜

劉統勲奏言口外臺站現議另行安設據侍郎

吳達善自肅州前往查勘北路並無驛站軍臺
馬匹亦屬無多係專遞軍機文報不能供大臣
官員騎用若照例雇給騾匹又恐羈延不能即
行馳赴臣因將營馬照依勘合撥給挨塘遞換
至攜帶鍋帳口糧所需駝隻亦於新補營駝內
撥給俟回肅之日仍照數歸營奏入報

聞

定西將軍永常疏奏和托輝特扎薩克公額林

沁病故

永常奏言從前和托輝特扎薩克公額林沁因患病不能前進留兵二十餘名在松樹塘居住調養令伊子協理台吉旺布多爾濟帶兵前進今額林沁業經病故旺布多爾濟現在軍前臣等酌量將額林沁之櫬交所屬參領錫拉卜帶同和托輝特兵丁等送回游牧奏入報

聞

丁巳

命議處科爾沁親王阿喇卜坦等

上諭軍機大臣曰此次由哲里木會盟處派兵一千
名前赴軍營該盟長親王阿喇卜坦及帶兵之郡
王齊默特多爾濟並所屬扎薩克等漫不經心辦
理苟且以致有悞軍行擅自退回游牧朕念科爾
沁蒙古等世受國恩凡有效力之處俱能奮勉非
別部蒙古可比現在扎薩克等理宜效法伊等祖

父竭力報効乃諸事怠惰相習成風去年朕車駕經過伊等地方並不修整道路橋梁有悞安設臺站今年派兵又復草率辦理起程逾限未至軍營退回游牧伊等恬不知耻朕深為伊等愧之阿喇卜坦齊默特多爾濟理應從重治罪以示懲戒但齊默特多爾濟已自知罪選兵三百名帶至烏里雅蘇台軍營雖經莫爾渾遵照朕旨將兵遣回但既經前往著加恩免革郡王降為貝勒革退御前

在間散上行走如仍怠惰偷安定行從重治罪至
所帶兵丁雖未經効力所有給過行裝口糧著加
恩免其追還其辦理遲悞之盟長親王何喇卜坦
副盟長公品級喇什那木扎爾亦從寬免其革職
各罰俸三年扎薩克王納旺塞卜騰喇特納扎木
素貝勒烏察喇勒圖等俱著罰俸三年

諭定北將軍班第等籌辦軍營口糧事宜

上諭軍機大臣曰大兵兩路前進已抵博羅塔拉指

日即可蕩平伊犁平定後班第等帶領官兵暫住伊犁所有大臣官員兵丁等需用口糧若照永常所奏由內地運送則輓輸勞費斷不可行如向該處夷衆責令供應又未免滋擾朕意平定伊犁後凡率衆投誠之台吉等俱各加封令其自行管束所屬人衆至達瓦齊乃準噶爾大台吉所有牧養牲畜及伊屬下輸納必多非諸台吉所應分用應即以辦給官兵用資口糧再有不敷將帶往銀兩

向厄魯特回子等酌量購買以資散給不得往行
徵派致滋擾累著班第豫為籌辦俟到伊犁後即
行定議奏聞

臣等謹案大兵平定伊犁除暴安民俾遐荒
永登衽席

皇上屢頒諭旨寬免新疆貢賦其駐劄官員兵丁應
資糧糈復先期傳

旨將軍大臣凡投誠台吉等仍令各轄所屬一切不

煩科派惟於達瓦齊向日輪納之項酌量撥
給使歸誠者不知徵發之事而向化者咸生
企慕之心

聖慮精詳無一不籌其萬全法垂永久西域素罹塗
炭之人亦何幸而生逢

聖世耶

戊午

定北將軍班第等疏奏分兵前進及移駐聲援

兵丁事宜

班第等奏言臣等兩軍會合一同前進於三月三十日至額爾得里克地方因兵丁馬匹經行戈壁又連遇大風稍覺疲乏前至察罕呼濟爾地方乃各處通衢要路雖有班珠爾等在前行走似不若臣阿睦爾撒納親身前往於籌辦軍務及察訪巴特瑪車凌實在信息遣人收服塔本集賽等人衆一切事宜較為有益是以公同

商酌揀選馬匹臆壯兵丁一千名臣阿睦爾撒
納色布騰巴爾珠爾青滾雜卜帶領在前先進
至察罕呼濟爾地方再候班第同進其餘兵丁
俱交與班第瑪木特阿蘭泰等帶領收養馬匹
相繼進發再從前聲援兵原派於布拉罕青吉
勒地方兩處駐劄今屯田之地已定在伊蘇圖
鏗格而等處相隔遼遠守望難周且附近游牧
之準噶爾人等俱已遷避惟餘曠土應將青吉

勒兵丁二千名移至察罕呼濟爾等處駐劄布
拉罕兵一千名移至伊蘇圖鏗格爾之東鄂倫
渾爾地方駐劄如此方可照管屯田之兵即偶
遇調遣亦可應時而集並於公齊旺多爾濟所
帶兵內酌留一百名派賢能台吉一員帶領在
額爾齊斯地方駐劄照管新投降之錫喇哈什
哈等其遷移兵丁已飭副都統扎爾杭阿等帶
領加意牧養馬匹牲畜嚴設卡倫防護地方奏

入報

聞

庚申

訓諭定西將軍永常

上諭軍機大臣曰前永常於帶往兵丁口糧內借支
十日運赴薩喇爾前隊兵丁繼又請辦理一月口
糧運往經朕明切降旨令其停止今又稱薩喇爾
所領兵丁口糧止可供支至六月初旬今擬自哈

密至烏魯木齊設立臺站每臺撥駝五百隻陸續
運糧接濟永常全不知事理之輕重顛倒舛繆至
於此極果應如此辦理上年即當豫備今明知成
功甚速乃反為此急遽倉皇之態不但合機宜
且使軍前兵丁聞知此言反將帶往口糧不加撙
節希冀多得勢所必有且永常身為將軍而刻刻
以口糧不繼為言更足以搖動衆心所關匪細永
常辦理乖繆毋論其事斷不可行即如永常所奏

辦理恐亦不能如期運到也至茶葉一項乃蒙古人所最需用者運送亦較輕便已令劉統勲派員運往俟運到時薩喇爾酌量兵丁內實需接濟之人即行賞給伊等或需用茶封或換易牲畜皆屬有益若無需接濟則留作平定伊犁後賞給新來投降之人亦可著薩喇爾即遵旨辦理再從前永常將接濟口糧之處咨商薩喇爾等薩喇爾扎拉豐阿鄂容安即應明白指示乃以前抵伊犁及回

至已理坤兩月口糧尚不敷用之語含糊咨覆亦屬不合即如平定伊犁後將軍大臣官兵等駐劄彼處亦豈有源源運糧接濟之理即應照朕前降諭旨將收取達瓦齊所有牲畜備用倘有不敷則以茶葉銀兩向厄魯特回子等換易口糧辦理分給現在運糧之事固無庸議及即大功告成後朕或遣侍衛官員前往彼處或由彼處遣人進京均應照喀爾喀掣取烏拉例行斷無裹糧行走之理

將此傳諭薩喇爾俟到伊犁後會同班第阿睦爾撒納等入於應議事內妥協議奏又

諭曰永常等摺奏據薩喇爾咨運到十日口糧已分給兵丁現在成功甚速所有續辦一月口糧不必再運即留於烏魯木齊地方俟撒兵時再行支給永常屢以接濟口糧為言經朕詳悉飭諭今薩喇爾以不須接濟咨覆果不出朕之所料愈見永常辦理乖繆看來永常不但不及薩喇爾且徒為薩

喇爾所笑伊尚時時獨逞意見欲炫其長殊堪駭
異嗣後母得似此多事倘復蹈前轍朕必不為寬
貸

乙丑

命西北兩路將軍籌辦投誠人等入

覲事宜

上諭軍機大臣曰昨朕降旨令新降人等分為兩起
按年入覲特恐驛站馬匹不敷支應今思本年軍

營備馬甚多選發兵丁每人議給三匹本屬寬裕
將來撤兵時從容行走不必再照此數給與此內
儘可通融抽撥若俟明歲凱旋之後沿途馬匹反
不能多為豫備且新經投降人等無不欲來瞻仰
翼荷殊恩應將此等應行入覲者俱令前來封爵
錫宴優加賞賚以光大典著傳諭班第阿睦爾撒
納薩喇爾等酌量辦理不必拘泥前降諭旨仍將
派定入覲人等數目及起程日期約略計算豫行

奏聞

定西將軍永常等疏奏吐魯番伯克莽里克率

衆來降

永常等奏言四月初五日吐魯番伯克莽里克
等前來謁見告稱據副將軍薩喇爾遣人欽頒
諭旨即率同伊子及兵一百五十名願隨副將軍効
力至哈畢爾噶地方遇布魯特二百餘人將馬
匹什物奪去是以復回至吐魯番今止帶七十

餘人前來遇遣往副將軍處回來之人令伊不必進兵仍往原游牧處居住是以未經前往願將伊弟阿里尼咱爾及隨帶五人遣赴副將軍處一同進兵所有吐魯番回子一千戶俱情願投誠臣等詳悉慰諭並將伊弟阿里尼咱爾量加賞賜送往副將軍處効力行走奏入

上諭軍機大臣曰永常等奏吐魯番伯克莽里克率衆一千戶來降從前薩喇爾奏投誠人等摺內有

吐魯番伯克莽噶里克欲帶四百餘戶歸誠先遣人稟知之語現在投誠之莽里克是否即係薩喇爾所奏之莽噶里克如即係其人從前已加賞賚若另是一人即速奏聞加恩賞賚再莽里克至哈畢爾噶地方為布魯古特若業經投誠之人豈可任從前投誠之布魯古特若業經投誠之人豈可任其擄掠來降人衆著薩喇爾等將此存記俟成功後再行辦理如別係一種布魯古特亦俟準噶爾平

定後將此項布魯特一併辦理

丙寅

定邊左副將軍阿睦爾撒納等疏奏由察罕呼濟爾地方進兵情形

阿睦爾撒納等奏言臣等帶兵一千名於四月初五日至察罕呼濟爾地方會合帶領哨探兵前行之郡王班珠爾貝子策布登扎布德濟特等詢問達瓦齊信息據稱並無踪跡彼處亦未

有俘獲之人臣等伏思達瓦齊聞大兵將至收
兵堅壁不出或在額米爾齊爾等處安設卡倫
潛伺虛實俱未可定因派喀爾喀協理台吉達
什等選兵十三名前往偵探復派喀爾喀貝子
策布登扎布厄魯特貝子普爾普公布顏特古
斯扎薩克台吉阿卜達什等帶兵三百名接續
前進臣等帶兵殿後俟至額米爾等處探得實
信相機辦理再已特瑪車凌現在何處亦尚未

得確信今由察罕呼濟爾前往如有可通哈薩
克路徑臣阿睦爾撒納即派屬下得木齊丹津
等四人到彼得有確信再遣員前往招服奏入
上諭軍機大臣曰阿睦爾撒納等領兵至察罕呼濟
爾地方尚未知達瓦齊信息現在進兵至額米爾
等處相機辦理並遣人偵探巴特瑪車凌實在信
息籌辦俱合機宜自必迅奏膚功朕意察罕呼濟
爾地方尚未得達瓦齊信息蓋因去歲至今準噶

爾全部攘奪無已復經巴特瑪車凌及哈薩克巴朗等擄掠夷衆皆無棲止之地星散奔逃是以如入無人之境達瓦齊料必不能固守如果能固守則噶勒雜特之哈薩克錫喇又豈肯避走西路耶看來達瓦齊勢已瓦解阿睦爾撒納惟加意奮勉迅奏膚功副朕鄭重委任至意

定北將軍班第等疏奏領兵至察罕呼濟爾地方情形

班第等奏言臣等與副將軍阿睦爾撒納等陸續前進約於察罕呼濟爾地方會軍今臣等於四月初六日抵察罕呼濟爾地方詢知阿睦爾撒納等因此處水草平常又未得達瓦齊信息已領兵前往額米爾等處臣思大兵現在深入臣等所領兵丁馬匹休養數日益覺飽騰現在選兵八百名令瑪木特阿蘭泰帶領先行會同阿睦爾撒納等一併進發尚餘兵八百名臣班

第隨後帶領接應奏入報

聞

協辦陝甘總督劉統勳疏奏拏獲察哈爾逃犯根
敦巴雅爾圖二名於三月二十六日解赴軍前
正法奏入報

聞

丁卯

定邊右副將軍薩喇爾等疏奏綽羅斯台吉衮

布扎卜等率衆來降

薩喇爾等奏言臣等領兵前進陸續招降各部
人衆於三月三十日據綽羅斯台吉衮布扎卜
及伊弟三濟扎卜率領二十戶來降四月初二
日布庫努特當扎木素等及九得木齊收楞額
等屬下一千一百餘戶來降初五日布庫努特
台吉巴爾珠爾五戶呼爾瑞台吉納木喀喇木
錐等三十九台吉共二百二十四戶來降初六

初七等曰阿巴噶斯哈丹得木齊普爾普等率
衆三千餘戶來降初八日葉爾羌喀什噶爾和
卓木前來告稱策妄阿喇布坦時將我父縛來
為質至今並不將我等放回我等情願帶領屬
下三十餘戶投降

大皇帝為臣僕并恭進玉盤一個臣等隨將

聖主恩旨宣示曉諭獎賞鼓勵并令各回原游牧處

居住外再葉克明安台吉已雅爾噶勒雜特宰

桑哈薩克錫喇告稱我屬下人等因比年擾亂
牲畜損傷生計貧乏請給與地方耕牧以資養
贍臣等即如所請令往吐魯番耕牧其籽種令
由吐魯番莽里克等處領取又額林哈畢爾噶
等處居住之人前以阿睦爾撒納被哈薩克擒
掠生計亦多艱窘因將阿睦爾撒納屬下未經
帶往二百餘人及額林哈畢爾噶本處窮夷八
百餘戶共二千九百餘人俱令在額林哈畢爾

噶等處居住附入有牲畜之扎哈沁宰桑敦多克等屬下俾給與籽種令其耕牧臣等於三月二十九日由羅克倫起程後噶爾藏多爾濟帶領伊姪扎那噶爾布前來情願同往進兵効力臣等留心察看噶爾藏多爾濟事事俱照臣等指示遵行形跡並無可疑且將軍永常現駐烏魯木齊以為聲援而和托輝特台吉旺布多爾濟厄魯特公丹拜及索倫巴爾虎兵又陸續前

進前後互為應援防範周密想噶爾藏多爾濟亦斷不能乘隙妄生覬覦臣等辦理諸事稽留數日此際達瓦齊想已得兩路大兵前進信息若不即遣人招服恐其聞風遠颺因繕檄鈴印曉諭利害飭侍衛塔奇圖及薩喇爾屬下前鋒策凌親王策凌屬下佐領孟克等於初四日由烏蘭烏蘇地方遣往傳示達瓦齊訖奏入

上諭軍機大臣曰薩喇爾奏綽羅斯台吉袞布扎卜

等各帶領戶口前來投誠及飭侍衛塔奇圖等前往曉諭達瓦齊辦理諸事悉合機宜朕心深為嘉予惟佇候伊等捷音薩喇爾務宜加意奮勉迅奏膚功以副委任再朕觀尼瑪所供達瓦齊現在情形將來薩喇爾遣人曉諭後固必前來投誠或此時達瓦齊一聞大兵信息即遣人至軍前請降皆未可定如果來降薩喇爾即一面受降一面仍帶大兵進發辦理一切善後事宜并宣諭達瓦齊毋

令稍生疑懼遵照前旨解送京師其噶爾藏多爾
濟率領伊姪願隨大兵前往効力諸事俱遵照薩
喇爾等指示辦理亦屬可嘉薩喇爾等毋庸過於
疑慮轉致別生事端至投誠綽羅斯台吉充布扎
卜及布庫努特當扎木素等率衆歸誠俱應即加
賞賚但尚未查明伊等名目等次是以尚未頒賜
賞賚著薩喇爾至伊犁時即行查明分別具奏朕
自加以厚恩先將此旨曉諭伊等知之至投誠之

和卓木原係葉爾羌喀什噶爾回部之長羈留準噶爾為質未經放回情甚可憫著薩喇爾即將伊派令前來入覲至回營時仍令復回原部並將此豫行告知俾知感戴薩喇爾此番籌辦妥協深屬可嘉著賞賜朕御用寶石數珠一盤扎拉豐阿鄂容安並著賞給荷包鼻烟壺以示獎勵

協辦陝甘總督劉統勲疏奏籌辦糧餉駝馬事

宜

劉統勲奏言上年辦運糧餉遵

旨無庸存貯哈密是以安西橋灣一帶均有分貯之糧本年前撫臣鄂昌因哈密之糧足敷裹帶奏將餘糧於哈密安西二處分貯伏思哈密貯糧不妨寬裕且安西軍營較遠遇有需用轉運為難現飭安西道文綬運赴哈密以期充裕又臣接廷寄以侍郎王保及侍衛端齊布等奉

旨遣往軍營令臣將巴里坤以西所需馬駝先期豫

備臣已飭在營官員在松樹塘收放馬駝挑選
豫備但查此次進剿準夷

大兵所至接踵投誠我

皇上遣使撫綏

特頒賞賚將來需用馬駝之處尚多現在為期甚
迫自應俟王保端濟布等到時於就近軍營挑
用惟是軍營所存馬駝收放未久恐難挑用臣
現於備戰餘存馬駝內撥馬三百匹駝一百二

十隻派令安西提標兵丁前往塔爾納沁地方
加意收放將來遇有差遣即酌定數目調赴巴
里坤以資接濟奏入報

聞



平定準噶爾方略正編卷十